

BONEPANI NOKPANTE

By

Simison R. Sangma



SKANGGIPA CHAPA KA'ANI
(2000 A.D.)

Published by :

Stephenson R. Sangma, B.A.
Upper Chandmary, Tura.
West Garo Hills, Meghalaya.

All rights reserved by the publisher

Price : Rs. _____

BONEPANI NOKPANTE

by

Simlson R. Sangma.

Skangtupa Chapa Ka'ani (2000 - A.D.)



Published by :—

**Stephenson R. Sangma, B.A.
Upper Chandmary, Tura
West Garo Hills, Meghalaya.**

All rights reserved by the publisher.

Price :— Rs.



JA·PANG KATTARANG

Bakrang	Jakrang.
1. Tom·ani Miksongani	— 1.
2. Nama Dakbewalrang	— 3.
3. Ma·nok Cha·a Nosing Gata	— 7.
4. Nokdang - Nokdangko Man·rikani	— 9.
5. Nokkromna aro Chawari Agatena Am·ani Bewalrang	— 13.
6. Ga·akako Wagata Besotako Sokchua	— 17.
7. Nokma	— 19.
8. Gro Gamani Bewalrang	— 28.
9. Bilrang - Nokdango Me·asani Bil	— 32.
10. Chrani Bilrang	— 34.
11. Songni Dakbewalrang	— 36.
12. Songni Kal·anirang	— 38.



Simison R. Sangma

1895 - 1967

Rtd. Asst. Teacher, Govt. Boy's High School, Tura,
Executive Member, G.D.C. /c Education etc.
Author of A'chik Golporang & Sonabal Me'chik

JANAPCHENGANI

A'chikrangni gisik seng'ani, chanchina changani aro nam-gipa dakbewalrangni gimin an'chinga aganritingbaaniko knaronga, jedake; Waltim chakao, Ajakrima-samariao, Doroao, Ajeao, Mangtua ba sia sarango, Wangala, Mangona, katta salling ba chisak aganao aro gipin gipinrango knarikrikbaani gnang. Ia A'chikrangni Niam aro Bewalrangkoa chengo BONEPANI NOKPANTEO A'chik, Dikil aro Megamrang dam-san tome chanchie tik ka'e donaha ine aganbaani gnang. Indiba ia niamrangko aro dakbewalrngkoa lekkao ba kitapo see donade dongja. Indake ong'oba Sorkarini Kachari Adallotoba, songo noko Nokma Lasker-rangba ia niamrang aro dakbewal-rangon pangchake groko bichal ka'ronga aro rai on'ronga. Angaba saksa skigipani kamko ka'pae bi:sarangna skie on'pa-anirangko neng'nikanirangko chagrongaha, aro ua somairang-onin ia kitapko sena joton ka'chengaha. Uandaken an'tangni uipaan baksa sing'rikkote ra'mitingo sadutang Janggin Lasker, (Sarangpa) MBE kitapko sejana angko ra'bie aganaha, uana uko mitella. Indiba anga seningna man'jaha.

Uandaken anga angni kamoni retire ong'ani ja'mano jen-salo Garo Hills District Councilni M.D.C.-na seokako man'e Executive Member, i/c., Education, etc., ong'ahaon songadam-rangchi wenjojomiting sal ba somoirango chasong-troskarango aro nokona re'bagipa Nokma Lasker-rango ia A'chikrangni Niamrang aro Dakbewalrangni giminba singsandijoljole ra:aha, jekai; Muniram Lasker, M.D.C. (Raksamgre), Takkil Lasker (Nengkong), Dillok Lasker (Dokongsi), Sawen Lasker (Waribok) Rojeng Areng (Bronpa), Denajing Pamong (Hilapa) aro gipin-rang. Uamangko anga mitela. Bi'sarang altuae ma'sina gita iano aganmeaparangko gale kandikate seaha. Ia kitapo katta bichongni miksongani kri bak 12 dake suale seaha. Ia kitapko seanichi chasong damberangna adita dakchakani ong'gen ine anga ka'donga. Iako namdapatgnina aganmesoke on'gennode kusi ong'begen.

Simison R. Sangma
Author.

Date 17th April, 1958.

CHAPA KA·GIPANI JANAPANI

BONEPANI NOKPANTE

(Origin and practices of the Garo Customary Laws and Socio-Cultural activities)

Ia chonbegipa kitapna manuscriptko Simison R. Sangma "BONEPANI NOKPANTE" ine seaha. Iako an·tang chapa ka·angna man·jaha; maina ua sengngang saaniko man·e chongmotan 1895 bilsio atchie 1967 bilsini October jaon siaha. Ua 1967 bilsini September jao uni segimin manuscriptrangko chapa ka·china angko okame aganaha. Ua manuscriptranga SONABAL ME·CHIK, BONEPANI NOKPANTE ARO CHABI BI·SA ong·achim. Iarangna agreba uni kitap A·chik golporangkoba chapa ka·taichina aganaha. Uaragoniko A·chik golporangkode chapa kataiaha, Sonabal Me·chikko chapa ka·mane aro ka·taiaha. Indiba ia Bonepani Nokpanteko aro Chabi bi·sa·ko chapa ka·ningna man·jaha.

Ia kitapo uni manuscripto jakkalgipa kattarang, spellingrang aro punctuationrangna agrede gitalrangko on·dapna ba ra·galna anga nangnikjaha, maina uamangni chasongo jedake kattarangko, spellingrangko aro punctuationrangko jakale uni manuscripto seaha ukosan iano type ka·aha. Indiba "Raka" ko on·dapna nangnike on·dapaha. Ia kitapko seanio uni banga ripengskaranggoba singsandijolaha ine angaba apsan nokni chawari ong·pae donganio adita ma·sirikpaa. Ia manuscriptko type ka·e on·e angna dakchakahanina aro iako chapa ka·china didiahanina Dr. Milton S. Sangma, Pro-Vice Chancellor, NEHU, Tura Campus-ko anga mitela. Ia kitapko poraie namdapatanina aganmesokode anga mitelgen. Ia kitap an·ching A·chik jatna maiba dakchakani ong·gen ine anga ka·donga.

Date Tura
15th September, 2000.

Stephenson R. Sangma, B.A.,
Publisher,
Upper Chandmary, Tura,
West Garo Hills, Meghalaya.

KI·TAPNI GIMIN JANAPCHENGANI

A·songko tom·tome rakkiani mingsa cholara, kajia golmalrangko name bichal ka'e gro ratani ong'a. Bichal tik ong'jaode, gro rataba kakket ong'jawa. Bichal ka'gipa niam ritirangko u'igipa ong'na nanggen aro gro rataba bichalo man'ani kri tik ong'na nanggen. Uni gimin bichal ka'gipa skia man'begipa ong'jaoba A'chikni niam-ritirangko ma'sigipa aro gro ratna changgipa ong'na nanggen. Minggipin neng'nikaniara, jol jolni kri niam-ritirang aro gro ratanirang adita dingtanggrikanirang ngang. Uni gimin jol jolni dakbewalni kri kajia-golmalrangko namatna changna nanggen.

Simison R. Sangma (Gredalpa) A'chik skia man'chenggiparangoni saksa me'apa ong'a. Ua songadam Nokmakundio donge aro ja'mano Tura donge Teacher kamo Pensionko man'e Garo Hills Autonomous District Councilni Executive Member ong'e ua A'chik niam dalbagipa ong'achim. Ua an'tangni u'ia baksanaba gipin u'igipa me'aparangoba singjikanirangko dake ia chongipa ki·tapko "Bonepani Nokpante" ine biming done A'chikni mongsonggipa niam ritirang maikai ong'bachengaha aro ja'mano maikai uarangko ra'gatbae A'chikrangni niam-ritirang ong'baaha uko see donangaha. Ua ia ki·tapko Bak 12 dake suale seaha aro Bak-antian A'chikrangni mongsongbatgipa niam-ritirang ong'a. Iarangan A'chikrangni a'bachenggipa ba original Niam-ritirang ong'a. Badiaba badiaba jolrango dingtanganirang dongode uan ia originaloni dingtangangasa ong'skagnok.

Anga ka'donga, iako chapa ka'atanichi A'chik poraigiparangna aro Kacharirango ukilni kamko ka'giparangnaba dakchakbeani ong'gen. Anga uni Chawari-Nokkrom Shri Stephenson R. Sangmako neng'bee kam ka'e iako ki·tap ong'atanina mitela.

Dated Tura,
The 6th November, 2000

(Prof. M. S. Sangma),
Pro-Vice Chancellor,
NEHU, Tura Campus.
Tura.

TOM·ANI MIKSONGANI.

A·chik pagitchamrang matcha melaram biaponi Rong-sramona kate dongon adita bilsirangni ja·mano, uamang an·tangtangni gamrangko palna aro gipinchiko brebaskapa man·na gita, jekai; nakam, kari aro gipin bosturangko; aro uamang rorirang baksa nangrimna biap dongjani gimin mai-dakode pilakchini manderang sokchimonge malrangko man·pa-gen indake anti damsako an·tangtangni song sepango Songkati Wakmetom Panchiao antiko ataha. Ua antiko atgiparanga Nangre Dingse aro Terani ong·achim. Uamangni segiparangni bimungranga Ebing Raja aro Desing Gitel ong·achim. A·chik-rang da·alona kingking uamangko anti atgipirang inc ming-singengachim. Uamangna skang A·chikrangni gisepo uamang gita pilakba indake dakkujachim.

Ua biapo A·chik aro Dikil damsan ku·mong nangtime songdong a·chamitingo uamang a·gilsako dongenga dipet mai-dakode tom·tome dongna man·gen aro an·tangtangni man·gimin gamrangko name ripingna man·a Songkate Wakmetom Matia Panchiao melana ku·mongatjok. Uamangni chasongo maiba jinmana nengnikani dongode uamang ua Nokpanteosa chanchiani biap ong a inc tik ka·c donrongachim. Ua Nokpanteou Bonepani a·tillao rikani gimin Bonepani Nokpante ine minga-chim. Uni gimin uamang ua Nokpanteo tom·e A·chik aro Dikil manderang chanchina ine manchiaha. Uamangni chasongo an·tangtangni gisepo maikoba jinma chanchiani 'gnangode gipin biapo ong gija Nokpanteosa chanchirongachim. Uandake an·tangtangni dakbewalrang namjaenga ine mike uarungko namatna ong·gijarangko srongatna ba ra·gatna nangode ua nokpanteosa chanchina manchiaha. Uni gimin Nokpantea melaram-mangdongram biap chengonin ong·baaha. Da·alona kingking a·rongga ba songsarek songrang songni a·tillao rike dongipa nokosa 'Nokpante' (Bandasal ineba jakala) unosa gro·a·selna maiba songni nokni nanggima melamangdong-ronga. A·wejoloba datororo songni bijatchikalao indaka

(melaram) nokko rike donna gnanḡ. Pilakchini manderang sokbatokahaon uamangko Megam Amijangsa matchu wak doke chaka-kingahana. Uno A'chikrang aro Dikilrang Bonepani Nokpanteo Megam Amijangni dokako cha'e aro chekako ringe nokma jinma chanchina asongon Raja Dopa katta parakgipa jinmao an'tangni chanchiako parakataha. An'chingni dakenga tik ong'jaenga gita nika, maina an'chingan an'chingni demechikrang aro depanterangko uamangni ska gita jeko jakoba kimgrikna on'e demechikrang gipinchi re'ange basakoba branggrikna nanga aro uni ma'a-pa aldu-mitanggipa dongjae brangna nanga; basakoba badiaba mande an'tangko aldu-mitangchina chatchi gipinko chawari rima. Iaba chawari obite ka'donggrikna man'jae man'gimin gamrang bon'chongdikani ong'a. An'chingni demechik depanterangna bate bilgribatgipa ong'e gipinchi bohari dake wataniara cholgri-apgri ong'e dukko man'ronga. Uni gimin iarangko maiba cholchi namatna nangchongmota ine ua aganaha. Unon tom'bagipa manderangoni chanchie aganaha. Uaranga iarang —

1. Siramni dedrang sing'aha, "indide sako noko donna namgen".
2. Nongalni dedrang aganaha, "an'chingni demechik sachonko ong'jaoba ma'a-pani namnikbatgipa demechik-kosa noko donna nanga".
3. Ruga Kotchuni dedrang aganaha, "Nokna don gipa demechikna sako chawari Nokkrom rimgen".
4. Doli mande aganatjok, "gritang sokchiko an tangko aldu-mitangna siatna gita chawari nokkrom rimgen".
5. Ku'rangko knae Muga Dingchepa aganataha, "iakon angaba namnikjok".
6. Raja Sirampa aro tom gipa pilakan jro'ro, "namnikjok" agantokaha aro namnike ra'chakaha.

Ua dal·gipa melaonin A·chikrang me·chik·chiko chatchi ma·chong de·e demechik sokchonko noko done gritang sokchiko nokkrom rime da:alona kingking ua bewalkon A·chikrang ripingenga. Ua melana skang maikai uamangni chatchi chanbe·wal ong·achim da o uko saksaba aganna man·jaha.

Ia Bonepani Nokpanteo chanchie A·chik Dikil pilakan an·tangtangni dakbewalrangko ra·chakmanaoni ka·sne ka·sne dingtang dingtang biaprango songdong a·chae an·tangtangni nama dakbewalrangko dakrorobae uamang uarangko da·ona kingking riping ja·rikbaenga, ine nikna man·enga. Ua tik ka·gimin bewal gita nokdangko rakina pagipa gritangko nokkrom rime uni chatchina agre gipin chatchina on·ja. Saoba maibakai gipin chatchiko chawari ra·e uan nokkrom ong·jolangode paani chatchi sandie nokko kanggen, ong·jaoba pani manokrang ua chawariko depante ba·na nanggen indake dakjaode ua chawariko rikgale gale pagipani chatchi ma·nokrang gipinko ba·e demechik sa·chonna watskagen, uno demechik dongjaoba nano abini bi·sako bi·ame dera·gatna nanggen, ong·jaode ua chawari nokni pagipani jong gritangrang chingni nokko seka jikko bala ine uamangna gro sotdok rang kosako gamna nanggen unon hudepani siani katani ja·manoba ua hutchumako chingni A·kim ine kangjawaha.

BAK — 2.

NAMA DAKBEWALRANG

Songkate Wakmetomo A·chik aro Dikilrang ruute dong·rimani ja·mano A·chikrang A·chik A·songchi (Garo Hills) aro Dikilrang Khasia (Khasi aro Jaintia Hills) a·songchi brange dongaha. A·chikrang A·chik a·songo dongpriprae uamang an·tangtangna songnok dake donge songprakan, Bonepani Nokpanteo ku·mong nangrimaniko jaike Nokpanteo chatchi·prakna ma·ate nokpante·jamisenge dongbaaha. Ua nokpantean da·oni skul nok gita chacha pilak A·chikni dakbewalrangko skie ra·ani biap ong·baaha. Chonchongipa dambe panterang

nokpanteon mamatang adatangchi maikai gipin ba gipinna bama nanga aro uamangko maikai mande ra'na skianiko on'baachim. Nokpanteon uamang an'tangtangni mamatang adatangrangna am'bol am'e wa'alko sike on'na nanga, aro uamang tuna siode uamangna simpakko andaptimna aro chiko kotimna nanga. Saoba ua kamrangko dakna aratode adatang mamatangni jakchi dokako man'achim. lan nokpanteni bewalchim.

Nokpanteo wata chengarangko skie ra'anirang :—

- (a) Jakni kamrang (Wata Chengarang) Wading chite kok, Ruan, Gijip aro gipin indakgiparangko watani.
- (b) **Kalgrikani** :— Wapong sikgrikani, bil susaa katsusaani Jakpong pe'a, wa'ring bila, Ro'ong de'a, ja'kol kala duruwea, sue goa aro gipin gipinrang.
- (c) **Doka - Dam'a** :— Dama doka, Kram nangkildik, Bangsi sika, Knal sika, Chigring doka, Illep sika, Gongbina sika Bebru Rongsil, Nangilsil doka aro gipin gipinrang.
- (d) **Dingani** :— Milam Sepi aro indakgiparang
- (e) **Rjng'ani** :— Gogaia, Gosaia, Cheraa, aro Gela ring'a, Kore doka doru ra'a, Gonda doka.

Nokpanteo rongtale 'donna man'a gita me'chikko nokpanteo ga'na niam dongja, saoba ga'ode nokpanteo marangni ua gro gongchibongako gamna nanga. Indakgipa namgipa dakbewalrang chengonin ong'baengachim. Uarangna agreba ka'mao mesokgipa A'chikrangni namgipa dakbewalrangko mikkangchiba jaktuatna nangja batesa bilakbate jakalna nanga gita nika.

1. **Ringa cha'ao panterang an'tangtangni mamatang adatangni** ba bilsi bribatgipa manderangni mikkango uamangni asongani chubatao asongja. Uamang cha'a aro ringanirangko uamangna skang cha'chong ringchengja.

2. Ringa cha'ao mamatang otangrangna (obite) skang ringani ong'ja, indiba saoba pante chonenga ong'oba uko otangni nokona watode uko an tangni pal uni mikim rasongna mande ra anina una on'chenga

3. Songre-songbatoba pante-desa mamatang ba gipin bri-batgiparangna skang re'rongja.

4. Maibaka'e jong gri mamatang ba gipinna skang jik kim-chengna nangode uni chuko ringani palo gitok chikjaskal uni chuko ringjawa (gitokna annachet-uni gonggniona).

5. Mamatang ba adatangrang an'tangtangni ma'gipa ba abitangni bi'sarang uamangni gritang ba namchiktangko jako paisa jakipatchengjaskal rime rona ba dangdikna dakbewal ong'ja

6. Pante ong'bo me'apa ong'bo sakgipinni jikko ba me'chikko mikkang wate kuri done re'ani bewal ong'ja. Saoba ia bewalko pe'ode segipana chonikani chibonga gro ganna nanga.

7. Pante ong'bo ba me'apa ong'bo chiga sepangko re'na nangode ba re'pakode ku'sik on'chengna nanga, ong'jaode gro chibonga nanga.

8. Mamatang adatangrang an'tangtangrangni nogipa nam-chikrang baksa ramram agangrikrongja aro uamangni ganna bararangko mamung saloba jakchi dangdikjawa. Nangchong-mota ong'ode go'olchisa de'gen.

9. Chigao me'chik me'asa damsan auani bewal ong'ja.

10. Me'chikrang mamatang jadelani mikkango re'pakani ong'on kratchaa gnangsa ganatang ku'sreko rimche'pa gnangsa re'pakronga. Saoba an'tangni ganna ku'sreko mamatangni jao nangatode doka man'a.

11. Me'chik desani turam tutipchi mamatang adatang ba je me'asaba ramram nape rona bewal ong'ja. Basakoba nina-

tangrang no-ko namchikko sason ka'ani salo dokna am'e uamang an'tangtangni dringchi nape katon mamatang dringchi chanape dokani bewal ong'ja.

12. Saoba badiaba wario na'tok chakramko ba burungo bijakol napako samsepe den'e kangako nokgipa dongjaode sakgipin mande mamung saloba jak dangdikjawa. Saoba uko manijaode uni gro gnang.

13. Saoba a'ba a'jrio wa'ako ge'e dona ba badiaba biapo panko ge'e dona indakgipa ge'ako nokgipani on'jaskal gipin jak dangdikna man'ja, saoba manigija dakode una gro gamna nanga.

14. Terik a'jriko nokgipana agre gipin ake cha'na man'ja, cha'ode unaba gro gamna nanga.

15. Mande jinma wari damsako na'tok rim'na nangoba pilakan damsan rim'esa suale antie cha'a. Uamang paltangtang bildingbildang rim'e ra'ja

16. Songo noko saa sia dongoba songni manderang pilakan ku'cholsan ku'mongrime duk chakrime pelsa pelgni gnanggipa on'gile gope ba so'e galani dakbewal donga. Saoba dakpajaode aro a'selko mesokna man'jaode uni gro gnang.

17. Songo a'sel ong'ode, chongmotan matcha chikode, mongma dokode ba Buga ra'ode song gimikan ku'cholsan bobilko warachakna krimkro re'a, saoba re'pajaode uni gro donga.

18. Songo saoba nokko rikode ba nokko ampan pinode songni manderang pilakan ku'cholsan dakchakgrima aro je man'a cha'anikoba ra'giltoka.

19. Saoba matchok me'sam man'oba saksan cha'ja, songna suale antiesa cha'a Be'en bang'jaoba bijakko song'e noksul na bijak palpraki sae suale cha'a.

20. Badiaba nokona soka sokon chuko cheke ringna nok-sulko okame ringa aro sokana do'oko doke ba wakbi'sako ra-sote mande ra'e sokako chaka.

21. Badiaba songko ba nokko wa'al kamon songsul pilakan an'tangtangni bil ama gita dakchakronga, indiba uamang duk ong'giparangko an'tangtangchi re'na on'ja.

22. Saoba pante me'tra ba buchuma budepa ong'eba be en bilgri ong'e ba mikgitok ong'e ramao bi'ame cha'na on'ja, indakgipako je cholchiba dakchaka.

23. Chatchi mande songgipino saode, uko nina jakrara re'rongja, rongchu ginde dakesa do'o koksep olesa saako nina re ronga.

24. Songo sabisi sokoba songsa songgipinni mande nap-rongja ba sagipa songoni mande namgipa songchi re'rongja. Saoba manijaode gro gngang.

25. Songo maibani a'sel ringani ong'on, man'chenggipa manderang rang'san an'tangtang ringaigija, an'tangtangni ri-pengska troskako mande ra'ani pal salam ka'chengesa ringa.

MA·NOK CHA·A NOSING GATA

Chengonin A'chikni bewal an'tangtango chatchi bangjaoba bang'atna kam nangan salo gamchi ong'jaoba bilchi an'tang-tangko pangrake chadengna man'a gita chatchi gipinko nang-rime ku'monggrike dongna man'a gita on'grikachi aro cha'grikachi ka'grikna miksongani ong'a.

Badiba songni mande saksa man'e cha'kalgipa me'asa marak pante ong'a, uagita songgipinni man'e cha'kalgipa jik marak ong'a, indiba iamang chatchi apsan ong'ja. Uamang nok-gni ku'mong nangrime ringgrike cha'grike dongani ja'mano chatchi apsan ong'jaoba ku'mong nangrimaniko, bilakatna

ma'gipa depante chan-grike marak me'chikko ama ine chane Rangko ba'e uachi re'anggen, unon ma'gipa changipa depante ine chane uko mande ra'e soka chakgen; aro una chuko cheke wakko rasote noksulrangko okame ringgen cha'gen kusi ong'e chrokgen mesagen, wa'se doke doro ra'e aro grikgen. Indake walsa salsamangde uamang cha'e ringe kusi ong'e dongani ja'mano pringo depante songtangchi re'angon una wakko rasote misal song'e wak ja'ping samsako olange watatgen.

Adita jarangni ja'mano ua ma'gipaba segipa baksa aro adita ma'drangko rimbite matchu bipa mangsako moe uni depante ba'gipachi re'angskagen. Uamang nokona sokon me'a-sako pagipa chane aro me'chikko ama ra'e depanteni jikgipa chubitchi chin'no man'ako sti so'o kamako on'gen. Uandakgen unoba doke dam'e grik mesae doro ra'e chroke ringgen cha'gen. Uamang unoba walsa salsana kingking cha'e ringe kusi ong'gen. Pring wala sengo uamang songtangchi pilangon depante bagipa aro bohari gital wak mangsako rasote misal song'e unbaksana wak japingko on'ate watatgen. Indake uamang ku'mong nang-rimgrikachi kagrika.

Indake A'chikrang chengonin ma'a-pa chong'mot ong'jaoba ba depante chong'mot ong'jaoba nangrime cha'grika ring-grikachi, basakoba nangan salo chatchiko bangata aro an'tangtangni chatchiko bilakata. Uamangni nangan salo je a'sel ong'oba saksa sakgipinko mamung saloba watgrikja. Ian A'chikrangni nangrimani aro ku'monggrikani mingsa chol ong'a.

27. Badiaba Sangmani doloni saksa an'tangni mosa boning nangani a'pal bi'sa re'achi re'dikmanode, ba mama ine okammanode ba ma'ni noni ganako dangdikmanode uachi Sangmani dolko marang nangata ine an'tangni jonggipa adatangrangna Badua gro do'o mangsa chu te'sa nanga. Ua groko gamesa an'tangtangni ga'tuangatangko janape an'tangni mamatang adatangni mikkango koripna nanga. Ua uko gamnan nanga, ong'jaode uko Sangma doloniko'alokgalgen. Ua uko gamna man'jana kingking ki'sango saaniko kadegen. Ua duk man'ako uni pa-gachi nike ka'sae ua saaniko enge watode uan nangako

gamna nanggen. Ian ong'gija srete dakako namatani mingsa chol ong'a ine chengoni A'chik panterang dakbaenga.

BAK — 3

NOKDANG

Nokdangko Man'rikani :—

Duramana ba'a nokbichongna dona ine agana, uan me'chik sa'chon ong'a. Uni gimin bak (1)-ni miksonga gita nokdangko man'riknasigipa demechik sa'chon-an ong'gen. Ong'jaoba ma'a-pani namnikbatgipa demechikrangoni saksa ong'na nanga. Nokmani nokdangko nokmani ba uni jikgipani siani katani ja'mano A'khingko goreko man'riknasigiparangko aro nokap-ki-gongko, tebrong te'narangko jilriknasigipa uan ong'gen. Uni gimin nokna seako man'gipa ka'mao mesokanio pangchake A'chikni dakbewalrangko da'ona kingking ja'rikbaenga.

(1) Badiaba nokdango demechik dongpaja, indiba uni dedranga depanterarasa ong'a. Indakgipa a'selo ua nokdango demechik ritima soksola dongjaani gimin an'tangni noska abitanigoniko me'chik bi'sako bi'na an'tangni demechik ine dera-gate ba'na man'a ba chol ong'a. Indiba saoba indake dakna sikjae an'tangni depanterangoni saksako ra'e bohari rime an-tangko aldu-mitangchina aro an'tangni nokdangko donnangna joton ka'naba donga, indiba chatchi ba chrarang indake dakna on'jawa. Ua nokdangko gipin chatchi boharina nokko gimaatna on'jawa. Ian A'chikni dakbewal ong'a. Nokni ma'a boh'ahaon ua bohariko rikgale gipin nokni sepangbatgipa ma'chiko rim-bae donegen, indakgipa A'chikni dakbewal ngang.

(2) Saoba an'tango demechik dongja-ana badiaba bi'sa aro ua bi'saba ma'a-pa inpaode uan nokdangko man'rikna-ma'gri branggipa me'chikko an'tangni de gita aldu da'atode sienggipa ong'gen ine sena man'a. Ua nokni sepangbatgipa chatchirangnade apsan chatchi ong'ja inc jegalna bewal ong'ja.

U'a bi-sakon apsan chatchi ine channa man'a, indiba a'kHINGNI giminde chatchio pangchaka.

(3) Badiaba noko nokdang nama indiba demechik saksako man'ani jamanon nokni me'chik ba magipa siaha, ua nokona sakgipin me'chikko apsan chatchioniko on'songaha. Ma'gri jadel bolchahaon aro sea-pa man'ahaon ua nokko chrarang aro chatchirang apsan dake sualgen. Jik sagini man'gipa gamrangko ma'desana apsan sualgen, indiba gitalo man'ako jikgitalnan on'gen, indiba nokgitchama gitchamni demechiknin ong'gen aro gital ma'gipa damsan dongna namnikjaode gisile cha'na man'gen, chatchi drajawa.

(4) Badiaba nokdango demechikrang bang'e dongachim, indiba ua budepa buchuma an'tangtangko alduchuna aro nokdangko man'riknasigipako sena skangan uamang siaha indaka a'selo chrarang aro chatchirang chanchie sawa nokdangko man'a krara uamang scokgen, uamang ama dipet je demechikan pagipani sepangkalako donga unan chanchiani ong'batgen. Maina pilak demechikrang se ra'tokahani gimin sa'chonko chanchiani dongjaha.

(5) Badiaba nokdango pagipa siaha niagipani saksa demechik ritima-soksola dongpaja, indiba depanterangde bang'a buchumako nirokna gita nio-sarirangba mamungkoba chanchijaha, ua saksan randi dongaiaha. Indaka a'selo ua bak-3-ni No. 1 gita ong'na nangen.

(6) Badiaba nokdang nama indiba ua noko jikgite sakgittam donga, jikmongma baksa sakbri ong'achim. Ua jik sakprakon demechikrang aro depanterang gnang. Nokma nokna chanchina skangan ua siangaha. Indagipa a'selo nokmani jikgite sakgittamni dedrang pilakan jik nokolni demechikrang ong'ani gimin uamang nokna krengpana bil dongja. Jikmamongni demechiksa nokna ong'gen aro uan pagipani pal ma'nokrangni watgipani jik ong'gen. Jikgiteni dedrangna ka'saode nokni gam gnangode sualna man'gen, indiba A'kHINGKODE man'jawa.

(7) Badiaba nokdango, ba nokma budepa buchumao demechik saksamangmansan dongaiachim, indiba ua demechikba an'tangni ska gita seko ra'aha, indiba uano demechikrang bang'a. Ua budepa aro buchuma an'tangtangni nokdangko ua chawarina donangna sikiac sudrangoni saksako seaha, aro nokkromba an'tang chatchioni dongjaani gimin chatchi an'tang sepangkalgipako rimaha. Budepani ma'drangba ukon namnikpaaha. Unon ua chawari kagipasa nokdangko man'rikgen. Chawari chong'motde man'jawa.

(8) Badiaba nokdango pagipa siangaha. Ma'gipa randi baksa demechik sakgni gnang. Saksa segnang aro nokoni ongkataha. Sakgipin segipa dongkuja. Nio-sarirangba ua randina mandeko sandia dongja, indakmitingo ua randi an'tangni ska gita seke kime gipinchi katangaha. Indaka a'selo sa'chon demechik segipa man'kugijagipa nokna ong'gen, aro uni pani jong griko sandie on'a nanggen. Ma'gipa pil'baoba nokni nokgipa ong'na man jawaha. Ian bewal ong'a. Ma'gipa seke kata ong'a,

(9) Badiaba nokdango budepa buchumao demechikrang dongoba segipa dongani ja'mano pilakan uaman'ko galgrime wataha, nokni budepa buchuma an'tangtangko alduna mitangna aro noko dongiikna dongjae nono-abioniko biamoba man'ja indakgipa a'selo uamang chiarang baksa kumonge gipin chatchioniko ma'de jakia ma'de jakasi ine chane nokna aro uamangko aldumitangchina deragatna man'a.

(10) Badiaba nokdango budepa buchumao demechikrang dongoba uamang budepani jonggriko ra'jani gimin ka'o nange rikgalatokaha. Nok-o budepa buchumasanjok. Unon ua budepa buchumana mamung simsakja nokko jamkoba a'a gnangko gamna suna amjajok. Ua chol ong'ode uni a'a nokko madrangna on'e buchumako rikgale manokna dongtime cha'na miksonga gnang. Indakgipa a'selo demechikrangoni saksa amako anga aldugen, na'a amanaba ka'saja aro dodrangna ka'saja, ine agane nokko ra'sekna bilgnang.

(11) Badiaba nokdango nokdang nama. Ua noko demechik-rang bang'a indiba ma'gipa pagipani nokna sena skangan antangtang namnikako dakgija seko ra'e ong'katokaha ja'mano ma'gipa siaha. Uni ja'mano chrarang budepana jik gitalko sandie on'aha. Indakgipa a'selo jikgitchamni demechikrangoni saksaba amani man'a gam ine kangna bil dongjawaha. Jikgitalni demechikrangoni saksasachonsa nokna ong'skagen.

(12) Badiaba nokdango nokni pagipa demechik saksaman'on siaha, unon pani chatchi ua randi me'chikna panteko on'songaha, unon skanggipa demechikko ma'a baksana chapaha. Adita bilsini ja'mano ua me'asaba sitaiaha unon bewal gita unaba skang man'gipa demechikko skang dongsogipa sakgni baksana chaptaiaha. Indakgipa a'selo buchumani bonkamgipa demechiksa nokna ong'gen ong'jaoba uni jikrangoni demechikrangoni saksako sandie ma'a pani namnikbatgipako segen.

(13) Badiaba nokdango nokna dongipa demechik pagipani jong griko ra'gija gipin chatchiko ra'aha, nokna an'tangni gri sokchiko rimnaba gipin demechik dongjaha. Indakgipa a'selo ua an'tangni chawariko ma'a no da'o dongenggipa chawarikon na'simangni depante ine chanchie unan an'tangni nokkrom ong'na gita rapabo ine aganon ma'nokrang ra'chakode uan chawari nokkrom gipin chatchi ong'oba ong'na man'gen, chatchi ra'chakjaode gipin demechikko deragatna nangen.

(14) Badiaba nokmao ba'a-chia dongpaja, uni gimin buchuma an'tang barimaoniko demechik saksako deragataha, nokma ua an'tangni gritangko nokkrom rimani ja'mano ua siaha. Uamangni nokna rimbae deragatgipa ua bi'sa me'chikko man'an ja'mano siaha. Unon nokma nokkrom buchuma an'tangni nogipani demechikko on'songaha. Ua demechikna nokmani gritang ong'jaoba chawari rime cha'aha. Adita bilsini ja'mano ua me'chikba siaha. Unon ua chawari gipin nogipani demechik nokna dongipako on'songe uni ma'a-pako alduchina watataha. Da'o nokma nokkrom aro buchumaba sisrangaha. On'songgipa nokma saksanjok. Ja'mano ua nokma me'chik saksasapsan chatchini segipa randi donggipako on'songaha. Indiba unoba deme-

chik sakgni gnang aro un baksa re·baha. Uamang dejakranan chawari rime cha·aha aro ja·mano nogipanaba rimaha. Indiba ua nogipade ma·detangmung donge uko aldu·mitangenga Indaka a·selo a·kHING sani ong·gen ? Chrarang pilakchiko chan·chie a·kHING da·o dongenggipa nokma me·chik baksa dongeng·gipa me·chikan ua a·kHINGko man·na ong·skaha.

(15) Badiaba nokmao ma·gipa demechik saksako man·e siaha uni nokona sigipani noska abini bi·sako man·jaha. Unon chatchi apsanni gipin amani bi·sako rime on·aha. Ma·gri demechik jadel bolchac sea·pa man·aha, indakmitingo pagipa siaha. Indaka a·selo gitcam gamko ma·desana sualgen aro a·kHING demechikni ong·gen. Ua segipa gipinko ra·taiode, indiba ua segipa pani chatchi apsanke ra·ode uamang apsan dongna man·gen aro a·kHINGba apsan ong·gen. Ua segipa ra·taiode ma·desa apsan dongna man·a. A·kHING ma·detangni bimungo donge demechikko sechapgen, chawari nitimgen.

BAK — 4

NOKKROMNA ARO CHAWARI AGATENA AM·ANI BEWALRANG

(1) Nokkrom nanggipa mande nokma ba ramram ba ong·ja maina an·tangan an·tangni ripeng sadutang ong·jaoba an·tangni chrarangoni saksu ba sakgni rimbite uamangko man·jaode saksanba an·tangni buchuma baksa maiba gamchatkalgipa bostuko ra·angna ba ugita uko ra·bite an·tangni nogipa ong·jaoba abitangchi an·tangni miksonga gritangna miksonge re ang·gen. Ua an·tangni bilgrianiko mesoke atte gitalko bi·amna grape agangen aro an·tangni miksongako bimung minggen. Unon ma·a no una ka·sae nangni namnikode changasa changja sapasa sapja nang·ko mamako aldurakjawa mitangrakjawa ine agane wataigen. Unon budupa an·tangan rimanggen ong·jaoba chrarang ja·mano rimegen.

(a) Ua an'tang baksa rimangode ma'a-pa ba ma'drang saksa sakgni ja'rikanggen. Attamo bewal gita do'si do'dokgen, aro re'bagipa ma'a no-ko aro chatchirangko soka chakgen.

(b) Am'beng jolo ma'a-pa dolgnian apsan tik ong'jahaode chrarang re'ange je bi'sako nikoba uko rim'e salbagen aro attamo do'si-do'dokgen. Salgipino ua katangode changgipino pil'e saltaigen, indake ua nokkromnade changgittamna kingking salgen.

(c) Budepa gritangko an'tang baksa rimangjaoba salko kape don'gen. Unon ua kamna tarie sachie donsoahaon kapa salo chrarang re'ange rimegen. Unon uamang nikode ma'drang matchu mangsa pani watatako moange ja'rikanggen. Pilakan sokchimongahaon bewal gita do'si-do'dokani ong'gen. Unon uamang walgimik do'si-do'dokani ja'mano kusi ong'e ringgen aro cha'gen.

(2) Chawari agatena sing'aba me'asani ma'o-pao sing'a nokkromna sing'a baksa apsan ong'a. Indiba sing'mitingo nokkromna ingija chawari agatenasa ine sing'skagen. Chawariko rimeaba apsan ong'gen aro do'si-do'dokaba apsan ong'gen

(3) Do'si-Do'dokani Bewal:— Do'si do'dokani bewal chengonin ma'drang bakska aro songni nokni manderangni mikkango ian talen iamang jikse ong'aha ine mesokani chin ong'a. Ia bewalko pangnan me'chikni ma'a pani nokosa ong'na nanga. Basakoba me'chikni ma'a pa dongjaode uni wanga pani noko ba abitang gumetangni nokosa ong'na nanga.

Nok-o mande jinma tomon kamal do'o manggni bima bipako rim'e me'chik me'ako sepango asongate do'o manggniko grango rimsrope me'chikko bak me'asako bak dake doksrope manggniko megolchi bilsa skorango doksote jinmani mikkango galwate dongen. Unon do'orang sina dekdeke gangprakprakako nie donggen. Siode nama ine kamal agangen. Uni ja'mano do'o manggnini bibikrangko oprake okgen, ki-i, topgipa topgni chaprime donggipako nigen. Uamang damsan damsan chaprimode

uamang jikse ku'mong nangrime donggen ine kamal agangen, indiba ua bibik dingtangrike dongode namja inc agangen. Ua do'o manggniko kamal aro uno donggipa manderangna chuko ringao cha'chapna so'e on'gen aro indake walgimik cha'e ringe kusi ong'gen. (**Iakon do'bik nia ina**).

(4) Chawari nokkromna ba agatena chrarangni rimbaon panteni ma'a-pa aro uni jongska adatangrang ja'rikbagen. Saksanmangmangkode watatrongja. Uamang chol gnangkalode dika olesa matchu moesa rimbara. Chawarini ba'rarangko uni jonggiparang ba gritangrang bobagen aro sokahaon attamo uamangna sakprakna gongsa gonggni dake on'atgen. Do'si do'dokani salsa salgnimangni ja'mano uni jongska adatangrang uamangoniko do'simpak cha'na, do'o bipa mangsako bi'gen, unon uamang uko nokpanteon cha'gen. Ua do'ode uni mosa honing dakgipade niam dongja uni jongska adatangrangna agre.

(5) **Chawari rimani bewalrang** :— Chengo Bonepani Nokpanteon jadelaang an chingni demechikrang cholgrigipa aro bilgrigipa ong'a uni gimin bil gnanggipa aro cholko dakna mangipa panterangko nanga ine tik ka'e don.manaha. Ua gita chacha bilgrigipa me'chikchinipak pangnan an'tangtangni nogipa namchiktangna segipako sandichengna nanga measachinipak mamung saloba dakani ong'ja, jedakode kratcha'anisan ong'a.

Badiaba nokdangni ma'a-pa an'tangtangni demechikna segipako am'on uamang demechiktangko je pantena sing'na chanchia uko namnika ba namnikja an'tangtangni gisepo sing'chenge minmanosa uamang me'asani ma'a pa-o sing'chenggen, unon me'asani ma'a-pa mamung champenga dongjaode aro namnikpaode me'chikni mama adatangtangrang me'asani ma'ani noko sing'gen. Uano me'asa jechakjaode me'chikni ma'a-pani noko mikkanggrike sing'e kattarang minahaon badiaba salko kape do'si-do'dokna dongen. Kapa sal sokon me'chikni chrarang ma'ani nokoniko rimegen. Unon me'asani ma'a-pa aro uni jongskarangni mikkango chawari re-banasigipani a'tot-turi daka dongama dongja sing'grike tik ka'gen. A'tot-turi dongode uni ma'a uko ra'rikgen ong'jaoba

(2) Badiaba nokdangni me'chik siaha, unon bewal gita sigipani nogipako on'songaha. Sigipani dedrang aro randi me'asa ringao cha'ao namjana me'chik bi'sa ma'chi kataha, unon me'asa chrarangna kataha ine aganna nanga. Chatchi aro charang kutani a'selko sandie agane rimangpilna nanga. Adita sa'rangni ja'mano aro pil'e kataiode aro indake changgni changgittam katode me'asa an'tangan an'tangni daka kamko kurachake rimena nanga. Indake dakoba namjaode me'asako a'khim chote galna nanggen. Ua nok on'songa man'gipani aro ma'grirangni ong'gen, aro me'asa ong'late katna nanggen aro an'tangni namnika gita jekoba kimna chol ong'gen.

(3) Badiaba nokdangni me'chik uno me'chik bi'sako don'e siaha. Chatchi una on'songna joton ka'bealichim. Unon randi an'tangan me'a me'chik gita dake adita sa'na sure songre cha'e sengaha. Indake ong'oba una mandeko man'jachongmotjok. Indaka a'selo chatchi uko a'khim chotna ga'aka. Man'gi bi'sa chatchi ba ambigipa donode uni jako ga'akgen.

(4) Badiaba nokdango, me'asa siaha. Unon sigipani jongriko pilakna skang sandigen. Unon skanggipa d'emechik dongode ukon ma'gipa baksa chapgen, dongiaode uano abini deko sandigen. Indake siana on'songara buchuma panteko on'a duk ong'a beben, indiba ua metra bi'sako on'dapa. Indiba iara mongsongde man'ani adani an'tangtangni ma'ani nokko gimatna nangja ine chanchiesa dakaha. Me'chik bi'sa ba ma'de ma'jongni ja'mano budepana on'songa iaba an'tangni dedrang nangako ma'grirangko maikai wate brangatgen ine chanchiesa uamang an'tangtangni kusi ong'aniko gimate, wanggipa ba pa'jongtangna re'a ong'aia. Indake ong'jaode uamangni nokdang gimagen aro bi'sa ma'grirang brange duk ong'gen, gipinni a'ba'ku salikimna sal sina nanggen, iarangko nikesa mamatangrang aro adatangrang ma'drang drana nangaha.

(5) Seke donggipa nokdangna chong'motan me'asa ba jik gnang aro me'chikba segipa gnang uamang sekgrike dongode indakgipa nokdangna chatchi segipa sioba ba me'chik sioba chatchi indakgipana on'srangja, aro indakgipa nokdangna nokkromba watrongja,

(6) Chengoni A'chikiangde ma'dong donggipako jongska adatanko kratcha'ata rasong chonata ine gimaatna gita su'e galronga. Indake dakanichi gipin nangipa chatchirangni ua nangija aro dakmalgija kamna ka'dingstekaniko chompengna jon'adarang on'ja.

(7) Badiaba mande bakdong dongce nokdang ong'on indake pa nokna me'chik ong'jaoba meresa sioba on'song-dambena aro nokkiomna chatchi manungkoba chanchijawa. Indakgipa nokdang dal'oba man'e ch'oba ma'drang chatchi mitchia aro uko ripingna mikbokja.

(8) Radiaba nokdango to'dong nama tani pisco na nokni me'chik Chambugong mahari aro uni segipa Agitok mahari on'ga. Uana igoni jikpipa siaha, uni biapo on'songna Chambugong mahariko ch'arang sandibejok, indiba man jajok. Indake-mung Chambugong ch'it'u an'tan tungchiko man jana makai nokko gimatjana ine made jakasi ine channe Mrong chatchioniko an'e una on'songah. Aro indake'ch'apsan, ua nokni meresa siaha, unaba ua nokona Agitok chatchi an'tangtango bara chira'ongpaiae segite chatchioniko manbae ua me'chikna on'songaha. Ian A'chikni bewal gita ong'jaoba, tere gita dilsan migita mingsan ong'jajok, maina basakoba ua nok Chambugong aro Agitok nok ong'oba gitcham chongmotan on'songako man mane uamangni sia lata lananode Chambugong aro Agitokni nok ong'jajok. Mrong aro Tegiteni noksa ong'skaha, indiba gitchamko chanchie ua Chambugongnin ong'enga, aro Chambugong ch'anan ga'aka.

BAK — 6

NOKMA

(a) A'khing Gore man'e an'tangni A'khingni ning'o dong-gipa manderangni kosako nirok sandie uamangni kosako hil man'e sason ka'gipa mandekon Nokma minga. Uni a'khingni ning'o sabisi sakanchi sokoba okkria cha'asioba songko nokko nirok sandinasigipa uan ong'a. A'khingona bobil ginal sokbaan saloba uan chaknasigipa aro kingnasigipa ong'a.

(b) Songo donggipa nokdang ba'ku cha'gipa aro rike dong-gipa an'tangko man'e cha'gipa gnannggipa ine mesokna songni nokni manderangko okame wak aro matchuko doke an'tangko mingsingatna an'tangni chrarangko okame sa'ra tilta songao jakpongo jaksan gane mesokgipakoba Nokma minga.

(c) A'chikrangni gisepo Nokmaan mingsinggipa bimung ong'a. Nokmana agic chubatgipa gadang dongjaha. Uni gimin ramram mandekoba mande ra'ako mesokna ine "Nokma" inronga.

(d) **Nike talatani:-** Songni mande an'tangko man'e cha'batgipa, nokdang dakna uibatgipa ong'a ine mesokna, noksul songsulni manderangko okamchimonge cha'atna ringatna on'e mande uni rasong salgichi gadoange salgio nangtinge gongdoangna man'jac a'achina gongonchoka ine bebera'a Indakgipa rasongko man'a badiaba mande jean Nokma inako man'a ska, ua an'tangni chrarangko ra'bigen aro an'tangko dakchakchina aganmikgen, aro ua ringa changantion krenga dakmaigen. Uni aganmikanina, "na'a guang bebe ong'ode, aro una mangsongbebeode chinga nangni chrarang wak mang sana, matchu bi'sa mangsana dila gita nikama" dakbebenakode dakeni". ine aganchake saoba wak mangsana, saoba matchu bi'sa mangsana aro saobara Danilna aro gipinrangna ku'rachakdingdange Ganna Chisal de'e kenja ine agane ku'rachakaha. Unon je mandean ganna am'gipa an'tango, man'a Gannarang, rangrang, mirang aro tangka chuongama chuongja nignok. Uni ja'mano bilakgipa wa'sagipa chrarang agangnok," na'a an'tangko bil gnanng gita nikode bipaoe dakbebeboda", ine ra'bigen. Unon basakoba changsao attamsao an'tangko chrarangko okame uamangna chuko cheke ringe kusi ong'e chrarangko ra'bitaic an'tangko ganatchina agangen. Unon uni chrarangba an'tangtangni bil ama gita ku'rachakgiminko tik ka'gnok aro ua gitan saoba Danilna, saoba Wakna aro saoba Matchuna. Indake an'tangtangni ku'rachakdingdangako uamang ra'batokahaon salko kape songna, songsulrangna aro chatchi ma'drangna uiatokgnok.

Manchia sal sokahaon manderang gannasigipa nokmani nokona tombatokgnok. Unon wal andalangaon nokma an·tangni dringo an·tangni namchiktangjetko an·tangko kniko chite kotip kaate tariatchina geetgnok. Nokma an·tangko kni chite tariatgipani an·tangni namchiktangna gongdokko ka·sae on·a nanga. Nokma kni chite tarimanahaode, uni chrarang uko jaksil patgen Unon nokma jechaka dake jaksilko patna on·gija dake okge gale agangen," angko jaksilko patna baditako ra·bajok, mobajok, jilla dalkuja song·a chakuja ine anga na·simangna aganjama" ine agane gando kancha bile chrarangko saigen aro jaksilko galata dakmaigen. Unon chraranga nokmao jaksilko gannate cheiakgija mangmangsa songna nokna chrako angdeko nikil kratcha·atna rasong onnatna ganna dakmaia songna nokna rasong dakbo ine gando kancha gale saie jaksilko gandraatgen

Indake nokningo chrarangni uko ganatmanosa nokma jaksil ganna gnang kotip gitchak, ba·ra marangniko kae maljuona chachat so·ramona re·bagen. Unon Kamal bewal gita patigipa ra·ron·gipa misi saljongko okame chachatko so·e mikmikgen. Unon uko dule nokma-nokmaskarang baksa grikgen aro mesa-gen. Chachat so·mitingo Rang aro Kramko doktokgen, uko ja·rike nokma jinmarang ba·ra marangni gitchak kotipko kai chrokgen aro grikgen. Unonisa uamang sa·ra tilta songaona re·anggen. Uno matchu mangsako rasote mitena an·chiko rugal-gen. Unosa Kamalna gongchigni on·atgnok. Uni ja·mano gannenggipa nokma mamatangrang adatangrangna ganpagijagipana sakprakna gongchigniko on·a nanga. Uni mamatangrang adatangrang skangon ganmanahaode uamangna sakprakna gitokna gongdokko on·a nanga. Uni ja·mano ugita nokmarang kotip gitchak kagiparang jakpongo Jaksil gan·giparang sogin·rangni manggisina meraa gita chrokgen. Indiba uamangba Sa·ra Tilta songako changgnimang wene chrokmanahaon saobara ja·sku sajok, saobara kang·kare sajok ine pasike songgnok. Unon gannenggipa nokma uamangna sanaba gongsa sanaba gonggni dake suale on·natna nanga. Unon uamang chroktaiigen. Unosa uamang walgimik cha·gen aro ringgen, chrokgen grikgen aro gannaniko doregen.

Songni manderang aro ma'drangrang kamko ka'giparang je wak donga uarangko rasote jakbok gita dake rate walgimik ritgen aro me'chikrang miko songgen aro cha'gen. Pring salchu-grahaon songni manderang aro songsulni manderang re'bagiparangna mi allako sualna pilakkon asongdulatoke sakprakna bi'sa desa gimiknan oko gnanggipanaba watchanggija mi palsa aro bijak be'en tin'sa dake sualtokgen. Indake sualako nike mitam me'chikrang mipal palsana wak be'en tin'sana an'tango dongkujaoba ba'ra kingdalako dole ong'jaoba ampokko kabite oko bi'sa donga ine mesoke mipalko man'rika aro wak be'en tin'sako ra'rika. Indake cha'e ringe walsani ja'mano Ganna chinade matchota. Gan'gipa nokma ua Ganna changsasan ong'rongja, bilsio changprakde gansrokna nanga. Indake ong'jaode Misi Saljong ua nokmana patijawa ra'ronjawa ine bebera'ani gnang.

(a) Akhing Gore man'gipa nokma rokom gni gnang. (i) A'chik a'songo chengode mande grichim. A'song chiga-antion nokgipa dongjachim, indakani salrango badiaba mande matgrik chatchiko dilgipa a'dok chigako am'e songdong a'chana namgipa a'khingko nikon ua biapko see ra'e an'tangni ma'drang chatchirangko okamchimonoge dongdil cha'dila indake dongdilgipaan biapni ba a'khingni Nokma ong'baa. Abong Noga Silme Doka brange biap namako am'jojoe Mongri Bri Sanapa A'dingo dongmitingo an'tangni matchu bima brangako am'e Dura A'bri Nokrek Midano deba sabakamako nike, uni duchakgipa biapon songdong a'chana namgen ine nike an'tangni sa'gre jinmako okame dongdilaha. Ruga Dajepa Kota Nangrepa uamangni chawarirang, Diran Rogua Basan Palwa Bangsi apalo donge uano nokma ong'eaha. Uni chin da'onaba Matchuki A'bri aro pokri gnangpiti. Uamangsa Meakgre a'palko dutchi hal wea besualchi ringchoa ine mingsinga. Uaragonisa ka'sne ka'sne chawarirang dintang dintang biaprangchina suale donge nokma ong'aha. Uandakgipa an'tangtangan bil bilgnang ong'e Nokma chong'mot ong'baaha. Unonisa chasongni chasongna songdong a'chae A'chik songo chonchongipa nokmarang piprae an'tangtangna a'khingko goreko see ra'e nokma ong'bae a'khingtangni goretangni nokgipa ong'e bilgnanggipa ong'baaha.

(ii) Badiaba Nokmara chatchi gimik ku·mong nangrime saniba palako tangkako gile breemung songdong a·chara. Ua nokmasa chatchini seokgipa nokma ong·na krara.

Indake A·chik manderang dingtang dingtang cholrangchi Nokma ong·e A·kHINGKO man·bahaoba chengonin man·gimin A·kHINGNI kosako Nokma bilrangko man·baenga aro ua bilrang da·alona kingking mamung dingtangkuja batesa mitam bilrangko uamangna on·dapenga. Chengonin uamang chatchini aro ma·drangni skotong ong·e a·songko chigako nirok sandie dilgipa ong·e A·kHINGKO jilgipa chong·mot ong·baaha. Nokmani bil chrarangni dakdilanichi aro dakchakanichi chatchiko mandeko dongdil cha·dilgipa ong·baaha. Chengonin a·song jakgitel ong·kujaonin nokma bilnanggipa ong·baha indaken nokma iarangko dakna bil man·a :—

(i) A·wil :— Uni mangsonga a·ani wilwilao donggiparang A·kHINGNI wilwilao donggipa manderang an·tangtangni a·ao nanga jakkalanirang chu·ongjaode a·kHING gipinoniko wa·ako bolko ba a·ako o·e cha·paode, indakgipa manderangoniko Ana briko A·wil ine ra·a, uni miksongan a·kHINGNI nokgipa ong·ako mesoknamangmang on·paani ong·a.

(ii) Nokmani A·kHING ning·oniko bolrangko ba gipin gamchatgipa bosturangko District Council Mohol palode kajinaoniko Nokmana A·wil gongprakoniko anagniko gamna nanga.

(iii) Nokmani A·kHING ning·o donggipa manderang bil siona a·barangko o·na skatang man·ja, uamang nokmani a·tilao tom·chenge uamangna sakprak Nokmani sana badiako on·a nanga suale on·akosa man·gen.

(iv) Chengo a·ana gro dakoba dingoba nokmani nokosa chaka kinga. Uni gimin nokmaan, a·kHINGNI nokgipa chong·mot ine uina man·a. A·malni simao bolchu ba ro·ongko ge·a gnan. Uarangko saoba den·ode ba pike galode galgipako uiode mat·chu mangsa wak mangsa unbaksa·tangka gong kolgrik nokmana gamna nanga.

(v) Nokma a'songna A'malni ning'o wa'ge ge'a gnang, ku-ro-ko ripinga, a'songna bol aro ro'ongko ge'a gnang uamangoni mingsako saoba gimatode una nokma matchu mangsa aro tang-ka gong kolgrik gro ra'na bil gnang.

(vi) A'song Tatmitingo nokma pilak ramarango ba chiga-rango kilding sringa gnang, maidakode patigipa ra'rongipa misi saljong patigen aro sabisi sakanchi sokjawa. Saoba songregipa ua kildingrangoni dingsako tetode ba manigija ra'ode nokma uko gro chibonga ra'na bil gnang. Saoba indakmitingo songo napode kani matchotjaskal re'na man'jawa aro ua songon dong-na nangen

(vii) Basakoba sal changode sal guri ba salpang sim'a ba Wachi ra'a. Iako nokma an'tangan dakdilna nanga. Wachi tatiam biapchi re'ange chu cheke amue aro unon chuchi aro chichi Kamalko aro nokmako chichi simbolbolgen uamang sin'jana kingking, unosa mite mikkako watata ine bebera'a Ukoba nokma an'tangan dakdilna nanga.

(viii) Sal nima inakoba Nokma an'tangan dakdilna nanga aro pilakan nokmako manina nanga.

(a) Songo mande siode a'bachu re'ja

(b) Bi'sa atchiao a'bachu re'ja.

(c) Antichi re'ange soke a'bachu re'ja.

(d) Skalko arika ba Bang doka rika. Unon Huroko doke nokantio nauate arika. Uamang marani mite makrena ong'jaoba hurona kene songchi gaja ine bebe ra'a gnang. Songni manderang jengge wate Rang kosa millam pongsa, dhuti kingsa aro nokni galgimin bostu-rangko rama bibrao gala, uni sepango amak ong'jaoba huroko kapakkrange wa'ako songdoe gala.

(ix) Galmak chong'motan a'a gitalko so'e uano miko misi-ko ba pilak gipin ge'aniko ge'na skang songni manderang a'ba-

tangtango do·chichi ba do·o bipachi mia-misiko patichina ra·ronchina Misi-Saljongo bi·e am·a ba A·siroka. Uni ja·manosa manderang songchi re·ange cha·e·ringe doke dame chrok mesae kusi ong·a.

(x) Badiaba noko bi·sako jako man·on ba atchimitingo sanangjae bi·sa oko sichipode ba bi·saba ma·aba siode ua noko sigipa manderanko galmano nokoniko mamungkoba ra·gija galchipronga. Ua nokni me·asana on·songna nangoba ua nok dingtangosa dongna nanga. Ua noko maiba gamchatgipa gamrang dongode uarangko antiona ra·ange pale gala indiba noko jakalja.

(xi) Badiaba nokni me·chik jonja bi·sako ba·ode namja sao nanga ine bebe ra·a. Uandake ua nokoniko songni manderang noksulrang mamung bitchriko ra·jawa. Bi·sa jonja sakgnian tangode ma·a ong·jaoba pa bakbakan sia ine bebera·a

(xii) Badiaba nokmarang songtango ba a·khingtango, kera·sichi kopinko so·na on·ja; maina kerasin wal·kusi sengana misi saljong ua nokmana gro nanga.

(xiii) Songgipinni manderang bilsina simpak ba ampak kikin nangode songni nokmani ku·pakaniko man·chengna nanga. Saoba nokmani ku·pakaniko man·gija simpakko kikode nokmana gro nanga, maina simpakko kikode matcha chika ine bebe ra·ani gnang.

(xiv) Chengode songni manderang skatang nokko sone rape pakma cherampe watna man·ja, saoba indake dakode nokmako chonika ong·a aro nokmana gro nanga.

(xv) Badiaba a·kHINGO dingtangdingtang nokmarang gnang chong·motan ;

(a) A·jikse (b) A·matte

(a) A·jikse song damsaon a·kHINGO ningo A·gitokni aa damsara Rangani a·a donga. Uasango dingtangdingtang

A'malni dingtangdingtang map gnang. Indiba ua A'malranga songsaon ong'a, a'khing ge'saon. Uni gimin ua A'mal gimikko A'jiksc minga.

(b) A'mate, Uara a'kHINGO saoba map kingsani ning'o donga, indiba mapo dingtang mesoke ma'ate A'matteko donna, indiba ua A'matteara A'kHINGNI nokgipa dalgipa saksani ning-osa A'matteko man'a. A'matteni nokma A'kHINGNI mamung bilko man'paja. (a) aro (b) songsani ong'ani gimin pilak nokmani kam ong'bo ba songni kam ong'bo ka'na nanga.

(c) **A'millam** :— A'millamni nokma dongja. Indakgipa a'kHINGKON A'millam minga. A'millam nokgipa grigipa a'kHING.

(xvi) Rongchu gala. A'brenGNI mi minahaon rongchuko su'e an'tangtangni a'bao rongchu gindeko ra'e a'ba jatchio chachatko so'e "Atchu Skal katbo" ine inwate amua. Uni ja'manosa rongchu aro migitalko cha'a aro tematchi chambilko cha'na man'a.

(xvii) **Ahaia** :— Ahaia A'kHINGNI manderang a'barangni mi-ko ra'mane jamo chipe done a'dalni mi misiko ra'mane jamo chipmano Misi Saljongko songchina rimbae an'tangtangni jam-ko nitimchina ine wa'kopo chachatko so'e "O ahai hai patigipa ra'ron'gipa Misia - Saljonga ching songna ching jamna ong'on-babo chokonbabo", ine inwate wakapo chachatko so'e okame songona rimanga. Indakesa songoba chachatko so'e amue misi-ko Saljongko songni manderang chuko ringe ja'manosa an-senggen aro chrokgen. Ukon Ahaia minga.

(xviii) **Wan'gala** :— Nokma saksani ningo donggipa man-derang a'batangtangni mi misiko ra'e jamtangtango pakman-nahaon a'bani Akaru Gomindarangko sreko gape dan'gnok. A'batangtangni kamrangko manderang matchote mi misiko jamo dan'e bilsu gimikna misi saljongni patianina mitelna cha-chat so'e amuna pilakan noktangtango churangko songgnok, ~~wak ba matchuko bregnok, dongjaode jinma gile bregen. Sok-~~ ~~gipa nagipa rebuade maiko song'e chane on'pagen ine dongpa-~~

gijamangba matchu be'en bre'e donsoe sokgipako nichaksoa, maina indakan salo sokjaode najaoe Misi Saljong noko gaja ine bebe ra'a. Nokni ma'a pa detangtangko ku'si ong'atna ba'ra gitalrangko bre'e on'gnok. Pante aro nomilrang kasotchengrangko kniko bikna aro nitoatna kasotna bregnok. Songni manderang sa'ra aro noksam nokgilrangko rongtalatokgnok. Songsaoni songgipinona re'ronggipa ramarangko bakrokgnok. Nokma aro songni manderang man'e cha'kalgiparang Rangrangko chane name tarisogen. Songni manderang pilakan an'sengtokgnok. Unon nokma aro gipin chu songa chahaode salko-jako manchignok. Songgipinni manderangba ua salo amikkani nokmani a'tillao wan'gnok ine knae chuko ringpana an'sengpana ka'tong gisik gimikan bal'srang dake ka'oksignok. Iasa manderangni an'sengani salna, chibima rikamchiko niatbo me'gong balako boksogim koripok nikatgen. A'bani kilrang ge'sa ge'gni bokritek gobajok. Aiao danang! iasa A'chikrangni an'sengani sal chong'mot. Songgipinni manderang chatchi grongna wene chu ringna kera ole jikko skang wate kuri done re'bagnok.

Manchia sal sokon attamo panterang nokantio songni jamrangoniko meserangko changgome rim'e so'e cha'gen, chuko ringgen dama doke songgimik re'jojoe kusi ong'gen. Pring wala sengahaon mitam nomilrang ba'ra gitalko gantokgen, me'asaba me'chikmaba pilakan ba'ra gitalrangko gan'e chine nokmani nokchina re'na taritokgnok, songni nokantian sokgiparang dongnaba donga. Uamangba Nokmani nokona re'na pilakan jingjangtokgnok. Pring salchugraon songni manderang aro sokgiparang pilakan nokmani noko naptokgnok. Nokma an'tango Rangrang donga gimikkon bikote donsotokgnok. Songni manderang pilakan napon panterangko damarangko dokna okamattokgnok. Pilakan sokgrimtokon nokma chudapo cha'chat so'gnok. Unon panterang chachat walkubaengako nike matchotgija Grim Grim ine dokgen, badita chachat walkua tarakbagen inditan damako dokaba wal'chagen. Nokko nokantion watchanggiya tingku balkop bolgro pilakon wanti tokgnok. Uni ja'mano nokantion nokmako ja'rike noktangtango wantiko tokgnok. Nokmani noko chachat so'mano adha kantamanani ja'mano damako doke, ka'sine komiange rangko aro kramko

chroktoe dokgnok. Unon nokmani noko mimung bijak brine dredre asongate du·gnok. Pilakan cha·a ringa matchotmano cha·spa mirangko aro bijakrangko pake uarangko ga·rinike chrokgen. Indake chrokmanosa sa·raona ong·kate uano me·chikrang chrokgen aro panterang rangrangko damarangko dokgen. Uandake nokpanteoni sulsul cha·anggen aro chrokanggen

Nokma mongsonggipani noko chachatko so·mane gipin A·jikse dongode uni noko chachatko so·gen ba A·matte dongoba uni noko chachatko so·gen ba chrokgen aro ringgen cha·gen Uandaken nokantio songni nokking bon·kujana kingking wallang sallang ringanggen cha·anggen. Banoba Delang dongode nok dongako ja·rike ringangmitingo ukoba so·jolgen. Indake nokanti cha·e ringe nok matchoton wangalaba matchotgnok, unon manderangba wegalgnok. Manderang wegalnasion songni dilgiparang ia wangalao maiba saoba ong·gija kamko ka·a donga ba dongja ba maiba agan·gni donga ba dongja sing·roke dongode gamate dongjaode name salko re·ata ine channa. Songgipini manderang chatchi grongjola gita wangala cha·jolna re·bagiparang sko do·me potesa kerao wanti tokesa misal olesa kosako kilteng ge·sa donesa songtangtangchi pilanggnok. A·chikrangni bilsini maniani gisepo ian dal·batsranggipa aro songo kusi ong·batgipa ong·a. Ia wangalana agre gipin maniani aro kusi ong·ani gipin grijok.

BAK — 7

GRO GAMANI BEWALRANG

Chengonin A·chikrang namgipa dakbewalrangko ripingna joton ka·gipa jatsa ong·achim. Uni gimin saoba mandeskarangna maiba namgijako dakode uko donnuja batesa parakna joton ka·ronga, maina uamang donnuna changgija indaken uamang rang·san namatna man·a gita gro ra·e namata. Indake A·chikrango namgija bewalranga an·cha·toreasan ong·bata. Uni gimin A·chikrango kajiarang mongsongbate jikko·seka aro nokdangko ra·seka lasan ong·bata. Tilleka·torea a·selko ke·a nama baksa ong·ode gro gamate namata, indiba ke·gijako ma·a

nangako nogipa nangako don manjaode indakgipa panteko jongska adatangrang su'e gala aro gro ra'oba sako ra'gen indaken ma'dong dongna aro bakdong dongna mamung saloba on'ja. Ian A'chikrangni chengonin dakbewal ong'a.

Gro gamani bewalrang :—

(1) (a) Badiaba pante me'chik segnangko toreode pante me'chikni segipana gong chibonga aro me'chikba setangna chonnikani gong chibonga gimik me'chik me'a gro gong kolatchiko me'asa segipana gro gamna nanga. (ua groko me'asani ma nokiangsa ra'gen ba chatchisa).

(1) (b) Pante jik gnang ong'ode pante an'tangni jikna gong chibonga aro me'chikna gong chibonga gimik kolatchiko pante-ni jikna gamna nanga. Uandaken me'chikni segipanaaba apsan me'chik me'a gong kolatchiko gamna nanga. Sakprako gong chibonga ka e gamna nanga

(2) (a) Badiaba me'asa segnang me'chikko sekode me'asa segipana gong kolatchi Rang ko'sa ba gong sotdok aro me'chik segipana so'malni kolatchi gimik me'a me'chik gong sotdok Rang kosako gamna nanga. (b) Badiaba me'asaba jikgnang aro me'chikba segnang, indakgipa sekode sekgipa dol me'chikni segipana gong sotdok Rang kosa ba gongdokko gamna nanga.

Gisik ra'ani :— Chengode A'chikrang jik seka an'chaa toreao tangkako gro gamja, indiba mandekosa so'malni kae moa doke sala aro nokol ita, manijaode den'e gala. Uni gimin panteko ong'china me'chikko ong'china jongska adatangrang kae salna chae sotna on'ja batesa gro dinga. Ua kamko ja'rike panteni a'sel ong'o pa gachisa gamna ga'aka, aro me'chikni a sel ong'ao uni chrarangsa gamna gaaka. Uamangna gro gamannosa chatchina groko ra'bagiparangko chatchi doke skie ra'ska. Ua dakbewalko ja'rike da'ona kingking me'chikni groko chrarang aro panteni groko uni pa-gachirangsa gamronga, indiba dra'ani ong'ja aro drarongja.

(3) Badiaba me'asa jik gnang me'chik nomil baksa toreode nomil me'asani jikna somalni gong chibongako gamna nanga.

Nomil mandeari ong'jahaode una me'asa bi'sako alduani pal gong kolatchiko una gamna nanga.

(4) Saoba me'asa me'chik segnangko kal'akode ua me'asa kal'aka man'gipa me'chikna kratchaatani gong chibonga aro segipana somalni chibongako gamna nanga.

(5) Badiaba me'chik segnangko skang wate kuri done a'ba re'ode ba mainaba re'ode segipa una namnikjaode una gong chibongako gamna nanga. Ian amitani kam ong'a. Saoba segipa ong'gija gipinni jikmung demung gipin mande dongjao rona joton ka'ako nikdikode uko rim'a, ukon amita minga. Ua amitao rogipa maiba namgijana miksonga donga ine uiode ua gro gamani ong'a "Ukon amita intekani gro ina".

(6) Badiaba nokdango mainaba kajia ong'e me'asa jikko ka o nange ma'chi nochi katanga, unon ua depante maina groko ra'ba a ong'a. Maina adita salni jamano jikgipa seni jakolko sananggen. Unon uni ma'a-pa aro jongska adatangrang matchu mangsa moe re'dilangna nanga. Me'chik seko ja'kol sannon uamang dilbaiaode me'chikni chrarang re'angtaigen, uamang me'chikko dilbajana kingking unon cha'e donggen, me'chikko aro denanteko dilbaosa uamang grai grai re'bagen aro noko a'selko sandigen aro namatgen

(7) (a) Badiaba nokdangona chawariko rimangaha, adita salna kingking ua niotang obite baksa dongon demechik segipako namnikjae uko galaha. Unon me'chik seko galani gro gong sotdokko gamna nanga, indiba nokde me'chiknin ong'gen.

(7) (b) Me'asaba apsan kamko ka'ode uaba jikgipana ap-sankon gamna nanggen, indiba me'asa nokoni ong'kate re'ang-na nanggen maina nok me'chikni ong'gen.

(8) Badiaba noko jikse kajia ong'e dokgrikon jikgipa segipako dokchakode segipani jong girirang an'tangtangko chon-nika ine somal cha'na re'bagen. Uamang re'bae songni jenikoba wakko su'e uamangni nokon cha'gen. Wakni damko ua kajia ong'gipa jikse gamna nanggen. Ian somalni gro ba seko dokpilani gro ba so'mal ong'a.

(9) Noksam malani aro dring dog aani gro gongbongaoni gongchibongaona ong'a.

(10) A'chikrang chengonin an'tangtangni demechikrangko roriko kimna dongna on'ja batesa uamang rorina kena A'chikrang roriko kimode ka'ode san baksa nio sari ine chane ku'mong nangrimgen aro sako jong gri chane sako nokkrom ra'gen. Ua pilakkon uamang chanchie chengonin A'chikrang gipin jat roriko segipa dongja aro dongna gitaba chatchirang on'ja. Sao-ba manigija dongode uko adatangrang mamatangrang den'e gala.

(11) (a) Badiaba pante metra baksa torecode chatchi uamangko rim'a man'ode metra pante nikchiagrikode kimgrikna man'a. Indiba metra Nokna ong'ode ba a'khim ong'ode ua pante seka ong'a ua bewal gita a'khimna gro gong sotdokko gamna nanga aro ma'ani nokko gimatgen.

(b) Uamangko rim'a man'on pante kimkamna jechakode, indiba me'chik mandeari ong'jaode ua bi'sako alduanina gro sotdokko gamna nanga.

(c) Badiaba me'asa jik gnang metrako torecode ja'mano uko rim'a man'ahaode uni jik namnikode aro chrarangba mamung a'anjaode ua uko jikgite ra'na man'a. Indake ong'jaode niam gita jikna gro gamna nanga. Ua apsan me'asa an'tangni jikni nogipako toreode aro me'chik mandeari ong'jahaoode uko chrarang una on'a sikjaode uko dingtangate gro gri donna.

(12) Badiaba nokdango jik aro se ku'mong nangrime dongna nangrimjaode ua nok tom'tom ong'na man'jaode, uamang jik se watgrikna ku'mongode me'chikni chrarang aro me'asani ma'drangrangba mamung champengani dongjaode uamang gro a'sel grian watgrikna man'a. Indiba dolgni-ni gisepo dolsasik maiba a'sel donga ine mesokna man'ode a'sel donga ine mesokna a'sel gnanggipa gong sotdok gro game watna nanggen.

(13) Jik aro se watgrikna dakon segipa an'tangni jikgipa una kragija kamko daka ine mesokna man'ode jikgipa segipako

gro gong sotdokko on'e watna man'gen aro segipa gong sotdokko ra'e nokko wate re'angna nanggen, maina nok aro dedrang me'chikni ong'a. Jik aro se je namgija kamko dakoba uamang watgrikna nangon uamangni dedrang ma'ani ong'gen uarangko alduna gita nokni je gam gnang a'a nok me'chikni ong'gen.

(14) Badiaba me'chik segnang saoba saksu me'asako seka, nokni ong'kate setangko galangode, ua me'chik gro baksa an'tangni noko man'niko gimaatgen. Ua me'chikni demechik nokko wate ma'ako ja'rikangode uaba an'tangni man'niko gimaatgen. Indiba ua me'chik bi'sa ma'ako ja'rikangjaode aro pa baksa dongpaode uan nokna ong'gen. Chrarang uni pagipana gipin me'chikko katanggipa jikgipani pal on'na man'a. Unon nokni mal-mattako uamang ma'desana suale ma'drang aro chrarang on'gen. Demechik segipako man'on uni madetang aro pagipa dingtang ong'katna chol ong'gen.

(15) Badiaba me'asa saoba me'chikko ki'sang doktopode ba sok rimode ba jakgitok rim'e salode uamang soko nangkujaoba me'asa me'chikna kratcha'atani gongchibonga gro gamna nanga.

(16) Badiaba me'asa me'chik saksako burungo ambol am'ao re'sal akao ba auram chikoramo gronga chadikao sikgi-jako toreode ua me'asa me'chikna ba me'chikni chatchina gong ritchasako gro gamna nanggen. Chengode indakgipa mandeko me'chikni chrarang sote gala.

BAK — 8

BILRANG

(a) **Nokdango me'asani bil** :— Nokdang gesako rikna nokni jik aro se sakgni damsan ku'mong nangrimaniko nanga, aro uchisa nokdang gesako rikna man'a. Uni gimin noko je gamko chimongna man'aha ua gimikkon me'asa aro me'chik jikse sakgni nangrime kamko ka'esa man'aha. Unon ua nokni gam chimonggimin sani man'aha ong'a ine chanchion nokni me'asa aro me'chikni gam ine nikna man'a, indiba jikgipa nokni me'chik an'tang saksan man'a gita uko angnisa me'kanga, aro nok-

ona sokbaani gimin gamko angni ong'a ine jakko badale kanga gita daka, uade ong'na man'ja. Nokko aro nokni gamko riping-gipa me'chikni kam ong'a, beben, indiba uarangko me'chik saksan man'ja aro chimongja. Nokni me'chik me'asako ka'sac rinok rinok dake an'tangko una on'kangsrange nangrime gisik ka'tong be'en gimikko pakwate angse apa ine me'asani gisik tom'tomgijako an'tangona salbae an'tangna kamko ka'ata aro me'chika uni man'bagimin gamko chimongtingipa ong'skaa, indakesa nok-o donggipa gam uamang sakgnini jik aro seni gam ong'a. Uni gimin me'asani chatchirang aro me'chikni chatchi-rang chanchie nokni me'a ba me'chik siani katani ong'on nokko gimatjana aro nokni gamko rengsi man'pana bakbakan on-songna ki'sang saa. Nokni me'asani sion me'asani chatchini mamung nangrima dongjaha, tangenggipa me'chik saksanisa ong'skaaha. Nokni me'chik siode uni biapona on-songna man'jaode ba on-songjaode nok aro uni gamrang demechik dongode uni ong'skagen, pagipa demechik-o nitime cha'ana agre gipin chol dongjaha. Ua nokni gam nokgipa ong'oba uni bil dongja gita ong'aha, aro uni chatchiba mamung bak nangjaha, indiba uano demechik dongjaode aro chrarang una me'chikko on-songna simsakjaode nok aro gamni uan nokgipa ong'e gipin me'chikko rimbana bil gnang.

Nokdangni me'asa gipin me'chikko toreode ba seke katode ua nokni gamko man'paani dongjaha, ba nokni me'chikba sakgipin me'asako seke katode ua nokni gamko man'pajawa. Indiba uni demechik dongode pagipa baksa donge pagipa nokni gamko demechik man'gen. Uan nokkrom ong'ode uan nokgipa ong'gen, maina A'chikni nokdangni bewal gita me'chiknin ong'a, pagipa man'jawa. Chengonin A'chikrangni dakbewal gita Nokdang me'chiknin man'rikani jolsan ong'baani gimin me'asani chatchi ua nokdangni rengsiko man'paja. Uni gimin me'asani chatchi ua nokdangna simsaka dongja aro nokdangni me'asa an'tangba nogipa namchiktangna man'paani dongjani gimin nameka'e simsaka dongrongja. Indakesa nokni me'asa nokdangni gimin nokgipa ong'ja ine A'chikrang aganronga. Nokdangni me'chikni chatchirang an'tangtangni dedrang su'drangni gam ong'gen ine chanchie an'tangtangni noktangni gam gita chanchie nokko kanga.

A'chikrang depanterangko ba'on odekmitingo "Do'ma" ine ka'sae bimungko donna, uagita chachan ua ja'del bolchahaode bile kata gita chacha gipinchi chawari rimange bile kata gita ong'a. Panteni ma'a pa an'tangtangni depanteni aldu mitanganiko cha'ani grijok. Uni nokdangoniko gamko ma'a pa man'paani grijok, aro depanteba an'tang gamoniko ma'na pana rengsiko on'atpaani grijok. Ua indaka a'selosa A'chikni nokdango me'asa gamni nokgipa ong'a dongja ine aganani gngang. Indiba iakon uia me'asa aro me'chik jik aro se sakgni nokdangko rikaha. Me'asa tangenga dipet tom'tom dongengode ua nokdangni nokgipa ong'paa, me'chiksan ong'ja. Nokdangko tom'tome ripingna sikode, chrarang an'tangtangni pa gachiko budepa changjaoba, olrak de'rakjaoba nomil namako on'e maidakode nokni rang gam katjawa nok tom'tom ong'gen, jillangkue nokdangko gimatjaenga. Budepa chan-gija nomil namako sandie on'e jilla aro sijana kingking ripinge donanan me'asa nokni aro gamni nokgipa chong'mot ine mesokenga.

(b) Chrani bilrang :— 1 (a) Songna gro nangode matchu bi'sa olode, songo noko ga'na bobilrang pilakchin bobilrang wilwile changdulode ukon, "Matcha elbikbiko, Do'reng gakasio" chra - panterangsa skang chila ja'man chaka. Ian songo noko bobilrango gimaoniko chrasa janggitangko on'kange ma'ko pako aro gachiko dongdila cha'dila, songko duule a'se o'dilla chonggi kadila.

1 (b) Chrarang dedrang bobilrangko dinge kee ame song skopango toreako knaon ma'a norang chubitchiko gimbeo kee ba pong gongriting ra'e ba'ra marangko dodoke pilakan rimso-gen. Rimchaksogipa pilakan dinge kee sokbagiparang nokbi-chong nokmani nokona jinma tom'e ringe cha'e kusi ong'e grikgen aro ringe mesagen.

(1) (c) Songo matcha chikode, a'song chigao do'kurang matku'rang knajan salo chra a'ba re'dila a'ba nitima. Indakgipa do'ken wakkenao chrani deni ka'a rakao aro bilo pangchaka.

(2) Ma'ni noni terik a'jriko den'e olan salo terik nokgipani chrarang krenge mandeko sote galna ba kae nokol itna am'on chrasa angdesa den'chake jokatani ong'a.

(2) (a) Bobilni gro ine dingan salo chrasa dingchaka.

(2) (b) Gammani salo chrasa gamchaka sichaka.

(3) (a) Ma'ni noni ronanggijan salo bobilrangni gro ine me'chikska rikode chrasa angdesa gamchaka sichaka.

(3) (b) Ma'ni noni gipinni do'chi chongchagoniko kolan salo chrasa angdesa gamchaka sichaka.

(3) (c) Nona namchikna mande am'an salo mamasa adasa mandeko sandigen salbaani ong'ode uamangan salbae on'gen aro ma'an noko ma'a pasa do'si do'dokgen.

(3) (d) Nogipa namchiktang ma'ani pani ningo dongmitingo skatang dakani ong'ja. Ma'a pa mama adasa demechikni namgija dakbewalni gimin agane on'ode uamang nogipa namchiko doke sate donanggen.

(3) (e) Nogipa namchiktang sakgipinni angse apa baksa rorim kalrimode, una gro man'an salo mamasa adasa doke sate ra gen aro gaman saloba uamangsa gamgen sigen.

(3) (f) Nogipa namchiktang se man'on seko pako mande ra jaode sena pana su'a song'a namjaode aro nokdang namangjaode mama adasa doke sae ra'ani ong'a. Indakesa nokdangko namatna mamani adani kam ong'a

(4) (a) Ma'a aro nogipa namchiktangni chrana dakna nanggni mamani soka salo nan salo nogipa namchiktang wak dokna nanga ato chu chekna nanga. Dongoba chekjaode dokjaode mosako boningko dokgen saigen ian chrani bil. Indakan salo ma'na nona ok aro jikna dena kok" ine A'chikrang inronga. Un salo ma'a no chrani deni maikoba ra'baako nichakani ong'ja. Mamani adani mikkim rasongkosa nina nanga. Unsalo nogipa namchiktangde an'tangni mamatangko adatangko dring chol-rurao ampok ja'groo asongatesa sti so'o kamako bitchi chinno man'ako kan-gen chekgen.

(4) (b) Chrani deni groko a'selko man'an salode ma'asa nosa chakna kingna nanggen. Jekai mama ada sakgipinni jikko toreode ba sekode ma'sa nosa nokchakgen, aro uni a'sel de'na kena nangode ma'sa nosa pasa gachisa gamna nanggen.

(4) (c) Mama ada an·tangni jikgipa baksa gisean salo ua katbaode ma·osa no·osa katnapgen aro uani a·sel gro gamna nangan saloba ma·sa nosa gamna nanggen. Uni gimin A·chikrang aganronga, “ma·a noa ja·dil jika dea bobil”.

(5) (a) A·chik chrarang panterang an·tangtangni ma·ako no·ko sason ka·ani bilko bano aro basako jaktuatbajok. Chrarangni ma·ni noni kosako jeko bil man·aha ua bilrang apsan dongkuna nanga. Chrarang an·tangtangni ma·a no aro namchik·tangrangni ong·gija aro kragija dakbewalrangko namatania chrarangni jako aro bilo, chengonin aro daoba ja·rikengkua.

(5) (b) Nodrang aro namchikrang an·tangtangni chrarangna niamana adana bamna sikani aro uamangko mande ra·ani gisiko basako aro bano susrangbajok? Chengonin ma·a nodrang aro namchikrang chrana bame aro uamangko mande ra·e dalba·atgimin ong·achim. Uamanga chonmitingo ma·a pani aro mama adani ning·o ong·aha dalahaon sea pa man·ahaon segipani ning·o ong·skana nangaha. Nogiparang namchiktangrang an·tangtangni mama adarangni uamangni namgipa dakbewalrangko nike ku·sa inode apsa dokode “basako angna na·ara chreng ine dim ine gamjok·sijok, basakoni mama ada” ine agane mama·ko adako kratcha·ata rasong chonata. Indine agana kattana chrarang kratcha·nabe aro kennabe batesa namatna bilonge dokbo, inbo aro wagilnabe.

BAK — 9

SONGNI DAKBEWALRANG

(1) **Mangona** :— Uni miksonga sigipani bimangko bonkame bonata. Chong·motan sigipani cha·angni ringangani pal songsul manderangko okamchimonge cha·e ringe bimangko bonata ba gimaata. Badiaba man·e cha·gipani noko siode uko bewal gita so·on galon·gen. Ua so·ram biapo so·ani taprako ra·e me·dik bi·sao ba kera bi·sao done maljruo kapake chokrek watao done ua memangna mipalko dine attam·pring mi pal·sa aro bijak pal·sa sae pangnan dongen. Wa·seoni chokrek wataona jang·ki dake

memang garurana man'a gita tarie donna gngang. Ua donnaniara mangonjaskal unon donna. Sa'rao je biapo mangko soa ua biapo delang rike uko ba'rachi pindape donna, aro ukon mangonani walo so'e chroke panterang dama doke ga'kimite gala. Ua Mangonani miksongan sigipani cha'ang ringangpaani pal bon'kame songni nokni manderangna cha'aniko ringaniko on'e cha'rim ringrime watani pal ong'a. Ua alaniko dakna gita songni Nokma salko jako kape manchie dongen. Unomiting pilak tarina nanga kakketko don-gnok. Alnakgipa nok-o merongko sure, am-bolrangko chimonge, re'salrangko ake, churangko song'e aro wak matchurang donsomanahaon, songsulrangna aganatokgnok. Ia pilak tarianirangko pilakkon songni manderangba dakchakgrimtoka. Chatchirang gngangkalgiparang saoba chuko songgitika, saoba merong, saoba wak aro saoba matchu rangiltokbaa. Unon manchia sal sokon attam seng'ngangon dama doke rang doke re'batokgnok, Songni manderang sokgipa nagiparangna song'e chane on'a tom'bae song'gipa song'gen cha'gipa cha'gen.

Attam walon songgipinchini sokbagipa sokbatokon mitam manderang noksam nokgilrango a'tip dake wal'tim sike a'tip dake donge songprak ma'ate donga. Sokbagiparang an'tangtangni dokbagipa damarangko rangiangko doke mitamranga an'tangtangni ra'bagipa bangsirangko spoe ringe cha'e chrokgen, mesagen aro kusi ong'gen. Sigipani chatchirang sigipana duk ong'e uni daka kamrangna gisik ra'e grapgen. Chatchirang jerangan sigipana miksonge mobagipa matchurangko attamon den'e galgen. Ua sigipana den'gimin matchukode badiaba songde cha'gija ripee gala, indiba mitam songni manderangde cha'a, cha'na dingtangmancha denskaa. Ua cha'na den'gipakosa sokgiparangna song'e on'a kam ka'ani attamo, manderang baksa song chelachini sokbaon pilakan sa'rao an'senge aro chuko ringa. Chuko chekgipa dingtang biapo asonge chekna gita dikako chu'a aro dalani kri cha'amo asonge chekna man'jani gimin gan'sang kaesa cheka. Chuko kan'gipani dolrang unoniko we'e ra'e chrokgiparangna, dama dokgiparangna aro an'seng-giparangna sualgen. Adita waltingangahaon grengni sepangbatgipa me'chikmarang grengni pal ba'rako ba'e gipin me'drang me'chikmarang baksa maljruko duule dama dokgipa baksa minge chenge sintie grapa. Uni ja'mano waljatchimango sa'rao

delang deltikaona me'chikmarang ong'kate uano grape grengni ba'rako ba'e chroke grapgen. Uno grengko bagiparang sintic ma'ringe grape ba'e jakko bawang bawange chroktokgen. Ia chrokani ja:mano ua delang deltikako nokgipa so'e so'ani walkiko dama doke panterang ga'kimitgen.

Ua walo walgimik songsulni aro songni manderang, pante-rang aro metrarang chroke an'senge chuko ringe damako doke bangsi sike walko re'atgen. Badiaba pante aro metra mikchagrika dongode metra an'tangni mikchagipa panteni sikenggipa bangsiko ra'seke ba uni kotipko ra'seke ra'bita dake chrokgen aro kore doke panteni ja'man ja'man ja'rikgen. Uamang sakgnian namnikgrika ong'ode pringo manderangni wegalna skang pilakon okame sing'rokani ja'mano mamung champenga dongjaode uamangko songchi watatgen. Indake mangonani ja'mano pringo pangnan maiba saoba ong'gija kamko dakarang dongama sandie tik ka'ronga. Saoba maiba dongode uko gamate ba namate donna. Indake mangonani ja'mano tom'tomaniko dake donronga. Ian sigipani cha'angani pal, songsulni aro songni manderang baksa alle cha'e ringe watatani bon'chotgipa sal ong'a.

BAK — 10

SONGNI KAL'ANIRANG (Country Games)

(1) A'songtangni panterangni susaani bewalrang chengonin A'chik panterang songprakni Nokpanteo tugiparang dingtang-dingtang kal'e susagrikan bewalrang gnanngchim. Ua kalsusa-anichi an'tangtangni bilrangko bilakate an'senganiko man'a. Uasan ong'ja, uamang gisikni an'saoaniko man'a aro dal'na chu'na skianikoba naata. Uamang songsa songgipin baksa kalsusani dongjaoba songtangtango nokpante teprakon ua kal'ani gnanng. Ua susaanichi saoba an'tangko pilakna bate bilakbata ine chanchie an'tangni bilko tosusana ba'rako boe songgipinchi ba antirangchi re'e ra'bia. (**Iakon Gando Makal Pala Minga**) Iano una mamung man'dapani dongjaoba, ua an'tangko bilaka ine mesokna man'ode uan rasong chaani ong'a aro ukosan ua am'a. Da'osa ua kal'anirangko gualo gipin jatni kal'anirangko

ra·gate kal·e an·tangtangni kal·anirangko gimatskaha. Chengo A·chik panterangni kal·aniranga ; (1) Gila kal·a ba gosusaa (2) Top kal·a (3) Ja·kol kal·a ba Tillu cha·a (4) Durup·a (5) Wa·ring bila (6) Kang·kare de·susaa (7) Jakpong pe·susaa (8) Wa·pong sika (9) Ro·ong de·susaa ba gosusaa an·ding sala aro gipinrang.

(1) Gilla kal·a ba goa. Kal·nasigiparangko changa ba changja brine pilakna skang dolgni dake apsangrik suala. Kal·na inira,ang sak·prakan an·tangtangna gona namako seoke rongprakko ra·gen. Gillarangko ma·prak dake riting dake jak·sibribri eng·e songgen. Uni ja·mano ua songgimin gillarangko skang doisa bing·e gogen. Gogipara·ng skang gochenggipachipakna gotaio nangatjaode ua changsa gotaina chol on·jawaha. Nanggimin gillako ba nanggimin gillako gita ma·eke nanggimin·ko dingtang rikamchipak songe don·gen. Indake ua dolni manderang badita nangata uko channe ma·eke rikamchipak donang·gen. Unon uamang samsachipak chadenge ba asonge gotaigen, samsachiba apsan chelaoni goanggen. Indaken ua dolsaba nang·jaona kingking ba jokaona kingking gogen. Skanggipa dolni nangatgipa saksaba dongjahaode gipin dolni manderang goskagen. Uamangba skanggipa dol gitan bing·e gotaigen. Uandaken ua dolrang bon·jana kingking gogen. Je dolan songgimin ma·chir·ni songgipako bon·e nangate bon·atgen ua dolan gipin dolko amaha ine cha·gen. Ua amgipa dol a·ako srite chinko done uko dolsa ine ingen, uandake uamang dolgnian kal·na sikjaona kingking kal·gen aro amgipa dol changantion an·tangtangni amani chinko srite chan·susagen. Sani dol srita dam bangbata ua dolan dol gipinko amaha ine cha·gen.

Indake panterang sa·ra namode aro jajong tenga tengrakode walgimik gimik amgipa dol amgija gipin dolko chonike a·boke kal·a. Indake panterang nokpanteo tugiparang an·senganiko dake walko re·ata.

(2) Top kal·a :— Ba·ra suriko romrome adita dal·e mikjak·tomang ro·e ki·me dake done topa ukon Top minga. Kal·nasigipa kotokko kaldilgipa saksako done seokgen. Ua kal·nasigipa skotongtangna an·tangni kalgiparangko seokgen, indake kotok gipinba uandaken seokgen.

Kal'na a'bachengon uamangni gisepo ari donna gnanng. Ua biaponi mik kolgrikmanng chel'ao dolgnian chadenggen, uamang biapsano chadengjawa, indiba biapko dingtangdingtang suale chadenggen. Mikkangchakgrikgipa kotok topko ki'meo rim'e gipin dolchipak goatgen. Unon uamang uko rim'sona joton ka'gen. Uandaken uamang pamong topko goatgen, indake mik-kang chakgrikgipa kotokgnian gorura'e rim'sona, je dolan changsni man'chenga uan gipin dol man'gijagipa dolni pamong-ko onia ka'na okame chadenggrike Topchin gotatgen. Unomiting gotatgipa dolni manderang amadipet an'tangtangko gotatna man'jana gita gelgen, gotatako man'gipa pamong rang'san Topchi kole gotatgipako ong'jaoba uni dolni mandeko biap-tango chadenge gotatskagen. Ua rang'san gotato uko nangatode uamangni amgimin gimagen ba skotong sakgni gotatna chadengon je mandeko gotata uko nangatjaode gotatgipa gotatako man'skana nanggen unoba uamangni amgimin gimagen.

Skotong sakgni chadenge amgipani dol amgijagipako gotaton gotatskana chol ong'jahaoode ba gotatskaoba nangatjahaoode amgipani dol amgijani dol mande saksako nokol man'aha. Unon uamang amgijagipa dolko nokol itna gita saksako okame Topko rim'atgen. Indiba ua nokol Topko man'on rang'san dol-tangchi katna joton ka'gen. Ua Top gnanng katangna man'ode ua nokol jokgnok, indiba jokangjaode uni man'ako nokgipa chanchapgen. Uandaken dolgnian kal'anggan aro aina changan-tion skotong sakgni gro ame skotongko gotatgen. Uno ammanng-kamaiode amgijagipa dolni skotong mangmangsangnok. Unon ua skotong saksangipa dolni manderang nokol ong'gnok. Unon uamang dolko ama chan'gnok. Uni ja'mano uamang biapko sregrike kal'anggan.

Indake uamang dolgnian nengkuja dipet kal'anggan. Uamang kusi ong'e amgipa dolni manderang amgijagipa dolni manderangko nokol itna Achakko gita do-do-do ine okame chonikgen. Uandake walko walgimik kusi ong'e susagrike kal'e walko re'atgen. Ian panterangni kal'e roani aro kusi ong'ani sal, iana agre mamung gipin chol dongjajok.

(3) Ja'kol kal'a ba Tillu Cha'a :— Pilakna skang kalnasi-gipa manderangko dolgni sualgen. Uarangoni dolsa ja'ako ga'chakna a'kol dake tarigen ukon ja'kol minga. Ia kal'aoba

dolgniko nanga, ja'kolni dol aro a'palo donggipa dol, dolprakon skotong sakprak donga. Skotong sakprak an'tangtangna manderangko segen. Ia kal'ao a'ani mamung ari dongja. Ja'kolni dol ja'kolo donge a'palo donggipako den'a chaanggen, a'palo donggipa jeoba chadenge donggen aro uamangba ja'kolko ra'sekna man'a joton ka'gen. Ja'kol dolni manderang a'palo donggipa manderangko den'e galna joton ka'gen. Ja'kolni manderang a'palo donggipako den'a chaangon a'palni manderang rongrete kate jokna joton ka'gen. Chaanggipa mande sronge chadengna nanga. Jeona soka unona gipinchi chataina man'ja. Ua chadengatangko watode a'palni mande chadraper den'skagen. A'palni mande nikjamitingo ja'kol dal'gipaona katangna man'a. Unonisa chabataigen.

Indake ja'kolni manderang uachi aro iachi chae den'gri-gen. Ja'kolo mande komiode a'palni manderang uamangni sim-sakjamitingo maibakai rang'san ja'kolko sekna man'ode uan ja'kolo donggipa dolko ama ong'a. Indiba ja'kolo donggipa manderangko amtoke mande dongjahaode unon a'palo donggipa dolko ama chana. Uandake kal'en dolsako amode biapko sre-grika aro kal'angtaigen

(4) Durupla :— Durupiao mamung gipin baksa susaani dongja. Bolchuko mik chignimang chuae songdoe biap on'tisa a'ding kro dake chudona nanga. Bolni skopongo wa'ambong dal'gipako napna gita on'tisa chonchoke jang'jote solla. Ua wa'ambongko jaksi gita gedok gesni repe suedilko kana man'a gita tarigen. Uko name tariman'ahaode ua wa'ako kotip gita ua bolni kosako stika gita songgen. Uko songon bolni ku'chottik-tako sueko wilwilna man'a gita don'gen aro uan wilwilchakram on'e uan "do-o-o-dot" ine gam'atgen. Ua wa'ani jaksi sol gipao suedilko dilprak dilprak kae mande rim'e gahatna man'a gita kagen. Uarangko kae tarimano panterang suedil dilprak sakprak rim'e bolko wilwile susite katanggen. Indake bi'sarang sakdok ba saksni bolko wilwile durupianggen. Unon uamang jinma durupiangpaode do'rengrang manggahina bi'wilwila gita nitogen.

Panterang senggnang a'ba sokon mamung gipin kal'ani dongjaode uan kusi ong'ani aro gilik an'senani chol on'e.

maina indake jinma durupiode dot-dot-dot ine gam'a, ua gam'ara songgipinona kingking knasopila.

(5) **Wa'ring Bila** :— Millamchi ba attechu Wa'ako ba maru buduko ong'jaoba Duchrek buduko bilsa den'e chotatna man a gita den'susani kamkon Wa'ring bila minga. Basakoba panjerang bolchu bi'sa ba mandal bi'sako den'susaa, jean den'e chotatna man'a uan bilakbata ine channa.

(6) **Kang'kare De'susaa** :— Pante sakgni chadenggen saksa sakgipinni kang kareo rim'e saksa sakgipinko de'songchokna joton ka'a. Saksa sakgipinko de'songchokna man'ode uko amaha ine channa.

(7) **Jakpong pe'susaa** :— Saksa pante an'tangni jakpongko krenge srongtak dakate an'tangni ripengna pe'na on gen Unon sakgipin uko jakasichi jaksko dakgipao sinjete jakrachi jakgitoko rim'e sinjete pe'gen. Unon ua jakko pakreona soke gongdipatna man'ode uko ama ine channa

(8) **Wa'pong sikgrika** :— Mikdok ba mikdni ro'gipa wa'pongko ra'e saksa samsachi sakgipin samgipinchi chadenge wa ako pakkol sepe sikgrikgen. Saoba a'ao ari don'gipako ga'bate sikna man'angode ua sikruruna man'anggipa pantean sakgipinko ama ine donna.

(9) **Dakgrika** :— Sakgni panterang chadenggrike saksa sakgipinni jakbrako jakra, jakasi rim'grike saksa sakgipinko ga'ake a'ao gostapna man'ode ga'akgipako amaha ine channa

(10) **Dama Doka** :— Nokpanteo an'sengani gitrang aroba doka-dam'ani kamrang (a) Doka-dam'a :— Dama doka, Kram, Nangkiltik, Chigrang doka, Jingjal doka, Bangsi spoa, Gongbina doka, Illep sika, Bebru sika aro Nanggilsu tota.

(b) **Dinggrikantiko Skta** :— Millam, Selu, Sepi aro Danil baksa.

(c) **Ring'anrang** :— Gogaia, Gosaia, Cheraa, ajea, kore doka Doru ra'a, Genda doka, Gela ring'a, Storara, katta agana aro Salling ring'a.